

LINDÅS KOMMUNE	
Klassering	
05 AUG 2019	
Ark. saksn. 19/329	Løpt m.
Saksh.	Tilgangskode

Stordalen Hyttegrend sit forslag til fråsegn mot vindkraftutbygging:

Nei til vindkraftutbygging i området vest og nord for Stordalen

Stordalen hyttegrend vil på det sterkaste motsetje seg at det vert bygd ut vindkraft i området vest og nord for Stordalen.

Årsmøte i Stordalen hyttegrend reagerer sterkt mot at områda vest og nord for Stordalen er rekna som tenlege område for utbygging av vindkraft av Norges Vassdrag og Energidirektorat (NVE). Stordalen og området rundt er vakkert og viktig for tur- og friluftsliv, har viktig beiteområde med mange stølar som vert godt holdt og er eit viktig krigsminneområde frå 2. verdskrig. Området er prega av små fjell, dalar og vatn som vil verta øydelagt for all framtid med ei utbygging av vindkraft i områda.

Stordalen ligg mellom Masfjorden og Sognefjorden på grensa mellom Masfjorden og Høyanger (sørside) kommunar og Gulen kommune i vest.

Dette er viktige tur- og friluftsområde for oss og for heile regionen her. Det er vakre område prega av vatn, fjell, myrer og mange stølsbygningar og rester etter stølsdrift. Området husa også Bjørn West styrkane i slutten av 2. verdskrig og det er årlege minnemarkeringar her med m.a. fjellturar, kransenedleggingar og minnetalar.

Stordalen hyttegrend er ikkje mot vindkraft eller grøn energi, men vert skremd når ein ser kva naturinngrep som skal til for å byggje desse vindkraftverka. Det må byggast store vegar inn i området. Det vert opplyst at det vert bygd ca 800 m veg for kvar vindturbin; med t.d. 40 vindturbinar snakkar ein om over 30 km med veg inn i eit lite område prega av tett i tett med vatn, små og smale dalføre på kryss og tvers og forholdsvis små fjell.

For kvar turbin skal det byggjast ein oppstillingsplass på størrelse med ei halv fotballbane. To vindturbinar på Svafjellet vil innebære at heile Svafjellet vil vert planert ut. Det vil i stor grad gjelde alle dei andre fjella i området. Dei er ikkje større enn det; Kvanngrødvarden, Flateheia, Dukefjellet, Blåfjell, Skovane og alle dei andre vil alle vera flate oppstillingsplassar og ikkje anna. Og frå alle hald skal ein sjå og høyre vindturbinar som reiser seg opp til 250 meter frå toppen av desse. Inngrep som er uopprettelege for all framtid og vil øydeleggja området for menneske og dyr.

Stordalen huser ca. 400 hytter, fjellstove, campingvognplass og alpinanlegg. I tillegg er det stor tilfart av dagsturistar for å nytte fjellheimen her. Fjellet vert nytta av fleire sankelag og sauer beiter over store områder noko som gjer sankinga tidkrevande. Området har normalt også ein varierande bestand av fjell- og liryper. Stordalen hyttegrend er uroa av at denne

bestanden kan verte ytterlegare svekka enn den er i dag dersom nye inngrep, anleggsarbeid og vindkraft kjem inn i fjellet her.

Det er allereie gjort formidable inngrep i dette området. Nærast alle fjellvatna er demde opp eller tilknytta uttapping til kraftproduksjon. For tida ber vatna og terrenget tydeleg preg av nedtapping og ikkje normal minstevassføring. Stordalen hyttegrend ser med stor uro om terrenget over vatn også vert forringa som følgje av vegar, oppstillingsplassar og vindmøller.

Det vert frå einskilde hald hevda at ein må byggje ut landbasert vindkraft fordi dette i dag er best økonomisk. For oss er dette reknestykkjet ikkje til å forstå. Har ein då rekna inn kva kostnad det er for oss og alle dei som kjem etter, at desse store naturinngrepa vert gjort? Kva ville kostnaden vore viss det skulle betalast ein viss sum til alle som no og i framtida mistar mogelegheiten for å nytta dette området og det var krav om å tilbakeføra det til slik det er i dag? Det er berre når desse øydeleggingane ikkje er kostnadsrekna at dette er lønsame utbyggingar.

Stordalen hyttegrend vil på det sterkaste motsetje seg at det vert bygd ut vindkraft i området vest og nord for Stordalen.

Med helsing


Steinar Myrmel

Kollåslia 8

5116 ULSET

Styreleiar i Stordalen Hyttegrend

Stordalen 31.07.2019